


Iroun Beretitenti
Thomas S. Monson



Manga kaokakin Tamnein te Kiritimati

Ririki aika a nako ngke I kairake ni mitinare, I we-teaki ma tabeman nakon te onaoraki n te Kaawa i Salt Lake ni karaoa te kakabwaia ibukiaiataei aika aoraki. Ngke ti rin, ti nooria bwa te kai ni Kiritimati ma taurana aika a raneanea man tamaroa ao n noori batia aika a karauaki n niiraki iaan mwaanga aika ananau. Ti rinanon kawai are ataeinimwaane ma ataeinnaine aika uarereke—tabeman ake a rabunaki baia ke rangaia ma te buratita, tabeman ake a aoraki are aki kona ni waekoa ni katokaki—a butimwaira ma te moangare.

Te kairake, n ataeinimwaane ae rangi n aoraki e we-teai, “Antai aram?”

I tuangnga arau, ao e titiraki, “Ko kona n anganai te kakabwaia?”

E anganaki te kakabwaia, ao ngke ti rairaki ni kiitana rarikin ana kainiwene, e taku, “Ko batinrabwa.”

Ti rianna tabeua te rangata, ao imwiina I ongo ana wewete, “O, Tari Monson, tekeraoi n te Kiritimati.”

Imwiina ao e oti te moangare ae korakora iaon moana.

Te ataeinimwaane e reke irouna tamnein te Kiritimati. Tamnein te Kiritimati bon te bwai ae n au kantaninga ti riai ni karekea inanora ao ni maiura—tiaki tii n te tai aei ma rinanon naba te ririki.

Ngkana iai iroura tamnein te Kiritimati, ti uringnga bwa antai are ti bukamarua ana koronririki n te tai aei n te ririki: “ba E bungiaki n ana kawa Tawita n te bong aei

ami tia Kamaiu, are te Mesia are te Uea.” (Ruka 2:11)

Inanon ara bong tamnein te anga bwaintangira e riki bwa te tibwanga ae korakora n te kanuringa n tain te Kiritimati. I titiraki ngkana ti kona ni kakabwaia man titirakinara ibon iroura, Ana tera au bwai n tangira te Uea e *tangirai* bwa N na Anganna ke nakoia tabeman n te tai ae rang kakaawaki n te ririki aei?

N na kona n taekinna bwa Tamara are i Karawa e tangiriira n tatabemaniira nako bwa ti na anganna ao nakon Natina te bwaintangira n te ongotaeka. I namakinna naba bwa E na bon butiira bwa ti na anga nanora ao n aki iangoira ibon iroura ke n tinanikubeka ke te kakauntaeka, n aron are e taekinna Natina ae kakaawaki n ana Boki Moomon.

“Bwa e koaua, e koaua ae I tuangkami, bwa ane iai irouna tamnein te kakauntaeka ao bon tiaki mai irou, ma bon ma iroun te riaboro, are taman te kakauntaeka, ao e kakiriweei nanoia aomata bwa a na itabaraaraa ma te un, imarenaia.

“Nooria, bon tiaki au reirei, bwa N na kakiriwei nanoia aomata bwa a na un, imarenaia, ma bon aio au reirei bwa a na riai ni kakeaki bwaai aikai.” (3 Nibwaai 11:29–30)

Inanon te bong ae moan te kakaawaki aei ni bwani-nin taai, ara tai n tangira ao ni buokiai tabeman man kabinonganara bwai ke ara taarena a bon kimototo, ma a kona n tauraoi n te tai ae uarereke bwa ti na karaoi. Ni

boong aikai iai nano aika a kukurei, taeka n akoi aika a na taekinaki, mwakuri aika a na karaoaki, ao tamnei aika a na kamaiuaki.

Temanna ae rangi ni korakora ana kantaninga inanon tamnein te Kiritimati e koreia:

Ngai bon Tamnein te Kiritimati—

I rin inanon te mweenga ae kainnano, ni kaurei mataia ataei aika matrake moaia, n te mimii ni kukurei.

I karikiia taan tinanikubeka bwa a na kooni baia n rau ao a na beenia nanoia n te mainaina;.

I karikiia aika a kara bwa ana riki ni kairake ao a na ngare n aroia ngke a kairake.

I kawakina te maiu n tangira bwa e na maiu inanon uarerekeia, ao ni kanakoraoi matu ma mii aika a raraoi.

I karikii wae aika ingainga ni katauraoi ibuobuoki nakoia ake a kainnanoia, ni katikui imwiia naano aika mimii ni bwaai aika a tamaroa n te aonaaba.

I karika te tia bakatae bwa e na tei teutana iaon arona n aki tautaekanaki, ni bakatae ao ni kanakoi bwaai tabeua nakoia ake a kainnanoi ake a na karekei rannimata ni kukurei—rannimata ake a kanakoi nanokawaki aika matodatoa.

I rin inanon karabuuti aika roo, n uring arou ni maroa ni kammaraki ake I rinanoi n au bong ni mwaane ao n tarai boong aika raraoi aika a na kaoti.

I karaurau n tei inanon, mweengan te maraki ae mainaina, ao riia aika a rangi ni mamaara n taetae a tii ruru ni kainabwaabu, te kakaitau ae korakora.

N aro aika ngaa ma ngaa, I karika te aonaaba ae mamaara bwa e na tararake nakon matan te Atua, ao n te tai ae uarereke a mwaninga bwaai aika a uarereke ao a uruaki.

Ngai bon Tamnein te Kiritimati.¹

Ti bia bane ni kunea tamnein te Kiritimati ae boou—ae bon Tamnein Kristo.

BWAII AIKA A NA TARAARI

1. E. C. Baird, "Christmas Spirit," in James S. Hewitt, ed., *Illustrations Unlimited* (1988), 81.

REIREI MAN TE RONGORONGO AEI

Ngkai ko tibwa ana rongorongo Beretitenti Monson ma te utu, iangoi kamatataakin te titiraki are e koteia

n taekan te bwaintangira are te Uea e kantaningaia bwa ti na anganna ke n anganii tabeman n te tai aei. Kaungaia kaain te utu bwa a na korei aia iango ao miia (ke, ibukiia ataei aika uarereke, bwa a na korei tamnei) n aron ae a kanga ni "kunea tamnein te Kiritimati ae boou—n aron Tamnein te Kristo."

RORONRIKIRAKE

Te Kiritimati ae Kororaoi

Iroun Jerie S. Jacobs

Ngke I a ikawai rake, teuana te mwakoro ae rangi n tamaroa ni katoa ririki bon Tairikin te Kiritimati. Au utu ao ngai ti karaoa te (pizza) bitia, nako n anene, ao imwiina ti ikotaki ibukin te taromauri n te Kiritimati. Ti anenei kuuna n taromauri ni mwakoro aika aua aika tangiraoi ma n anenei kuuna n takarua iaon ara bwai ni katangitang aika kamimi n aekaia nako. Tamara e kainiin n tainako n te tairiki ma reirei n te Kiritimati are e katikuira ma rannimata ni kukurei. Te maiu e aki tamaroa riki nakon Tairikin te Kiritimati.

Ngke I a ikawai riki, tinau e a moanna n tabeakina te kairake ae kaain rarikira, Kelly. Kelly e roko n ara auti ni katoabong imwiin te reirei ngkai tinana, Patty, e mwakuri. Kelly e ririmwiu n ai aron te bwabii—ni kaberoro ao ni bubuti. I rangi n au ngkana e roko Patty n anaa natina te aine ao ni katuka mweengara ao au utu inanon te rau.

Teuana te Ritembwa, I rangi ni maaku ngke tinau e kaoa Patty ao Kelly bwa a na raoniira n Tairikin te Kiritimati. Au Tairiki ni Kiritimati. Tinau e moangare ao e karaua nanou, "E aki bita te bwai teuana." Ma I ataibwai riki. A na kang ni kabane ara biitia. Kelly e na bwainingarea ara anene. I kantaningaia ao I butimwaea anne bwa e na riki te kabanea ni buakaka n Tairikin te Kiritimati.

Ngke e a bong, Patty ao Kelly a raoniira, ao ti maroroo ao ti ngare ao n anene. Tinau e bon eti. E *bon* roko raoi. N te nuukanibong a kaitauai ao a kiitana mweengara. I nakon au kainiwene ma te nano ae kukurei. I kunea bwa bwaintangira aika rangi ni kakaawaki n te Kiritimati a bon aki maunanako ngkana a tibwauaaki. Onean mwiina a karewe ao a kamwaitaki ngkana a tibwauaki nako.



Onimaki, Utu, Buoka

Kakawari n Reirei, te Mwakuri ni Kamaiu

Tataro muuaka ni kamatebwiaia te bwai n reirei aei, n arona ae riai, maroroakinna ma aine ake ko kawariia. Kabonganai titiraki bwa a na buokiko ni kakorakoraia aine ao ni karaoa te Bootaki n Aine bwa iteran maium ae kakaawaki.

Te kakawari n reirei e anganii aine te tibwanga n tararua, kakorakora, ao n reireia temanna ma temanna—bon ngaia te mwakuri ni koaua ni kamaiu. Rinanon te reirei ni kaakawari, a reireiaki aine n tei ibukin te Tia Kamaiu ao ni buokiia aine ni katauraoi ibukin kakabwaia n te maiu ae akea tokina.

“Ti na ‘kauring, maroroakina, kaunga, ao n reirei, ao ni kaoia [tabeman] n roko nakon Kristo’ (D&C 20:59), ngkai e taekinna te Uea n ana kaotioti,” e taku Beretitenti Spencer W. Kimball (1895–1985). E reitia, man taku, “Ami kakoaua bon te kawai ae rangi n tamaroa n reita te rongorongo.”¹

Ngkana ngaira taan kakawari n reirei ti karakai ara atatai ni koauan te euangkerio, ara koaua a na kakorakoraaki ao ni boutokaaki irouia aine ake a katauraoi ao ni bwabetitoaki ao ni kamato-aaki. Ti buokiia membwa aika a boou bwa a ana riki bwa angka inanon te euangkerio. Rorokora ao ara tangira a ibuobuoki “kaokiia naake a tia n tionako [ao] kaabuei nanoia naake a tia n un n te euangkerio.”² Ao ti kaungaia aine bwa a na nakon Kristo rinanon te nako n te tembora.

Kam na nako ni kamauii tamnei,” e taku Beretitenti Kimball nakoia

taan kakawari n reirei, “ao antai ae e kona n taekinna ma mwaitia aomata aika raraoi aika kakaonimaki n te Ekaretia ni boong aikai a kakaonimaki ibukina bwa ko mena ni mweengaia ao n anganii te taratara ae boou, te tamnei ae boou. Ko kakoti bwaai aika a kai atai. Ko karakai riki aia taratara. . . .

“Ko nooria, ko aki ti kamaiuia aine aikai, ma ko bon kamaiuia naba buuia mwaane ao mweengaia.”³

Man Koroboki aika Tabu

Doctrine ao Covenants 20:59; 84:106; 138:56

Man Rongorongora Ngkoa

Ngke te Burabeti Iotebwa Timiti e katea te Bootaki n Aine, e taku bwa aine aki tii tararuia kainnano ma ana kamaiuia naba tamnei. E reireiniia naba aine n te Ekaretia bwa iai tibwangaia ae moan te kakaawaki n ana babaire ni kamaiu te Tama are i Karawa.⁴ Ni kairaki man te reirei are e anga te Burabeti Iotebwa Timiti, ngaira aika aine n te Bootaki n Aine ti kona ni ikotaki ni mwakuri ni katauraoia aine ao aia utu nakon ana kakabwaia te Atua aika korakora.

“Ti na karekea te nanoanga imarenara,” e taku Beretitenti Brigham Young (1801–77), “ao

kariaia [naake a] korakora bwa a na aikoia n tararuia ake a korakai bwa a na korakora, ao kariaia naake a nooraaba bwa a na kairia aika mataki ni karokoa a kona n noora kawaia ibon irouia.”⁵

BWAI AIKA A NA TARAAKI

1. Spencer W. Kimball, in *Daughters in My Kingdom: The History and Work of Relief Society* (2011), 116.
2. Eliza R. Snow, in *Daughters in My Kingdom*, 83.
3. Spencer W. Kimball, in *Daughters in My Kingdom*, 117.
4. Taraa Iotebwa Timiti, n *Daughters in My Kingdom*, 171–72.
5. Brigham Young, n *Daughters in My Kingdom* 107.

Tera ae I Kona ni Karaoia?

1. E kanga te Bootaki n Aine ni katauraoai ibukin kakabwaia n te maiu ae akea tokina?
2. Tera ae I kona ni karaoia ni karikirakea te onimaki irouia ake I tararuia?

Ibukin rongorongona riki tabeua, nakon reliefsonline.org.